

天一閣藏明代方志選刊續編



嘉靖南雄府志（廣東）

嘉靖始興縣志（廣東）

嘉靖惠大記（廣東）

嘉靖興寧縣志（廣東）

天一閣藏明代方志選刊續編

六六

上海書店

南雄府志序

賜進士通議大夫吏部右侍郎致仕前南京都察院右副都御史恭和歐陽鏞撰

嘉靖癸未余領督學東廣之

命仲冬之月遵庾嶺而南道旁松數千
章甚奇古相傳張文獻公手植徘徊
久之抵雄凌江已月上矣舟遂夜發
明年孟夏廼復至雄視學有間上政

平樓望巾山挹金馬招威鳳於東岡
占瑞龍之晴雨壯哉五嶺之晉一大
奧區也盡保昌始興地雖不能百里
然而襟百粵帶群蠻內通江漢外控
番禺屹然南國之紀攷諸前志秦漢
略焉唐自開元而後梅關刊木人文
內昭至于宋元深矣而其事亦多闕

亦有不可以訓者會議修通志檄學
官弟子傳取草上之未竟余以遷去
後二十年保昌進士譚子勑攷索載
籍刊誤剔蕪增益其未備發凡舉例
爰成新志太守胡君永成重加校定
錄其副遣朱生肅蔡生稭後卽會雲山
庄示余其言沿革之故利害之端詳

矣大書以敘事分註以載言蓋用史
記灋以志亦史也詩文有通錄有節
文有刪句刪字此以志而權筆削貴
質也諸有久廢而不宜廢者不以入
故蹟後有復焉者可也山川必高大
靈異者望也祠廟必有大功德者思
也望可表也可祀也思則不淫矣名

宦以爵敘者制也鄉賢以世敘者猶
尚齒也食貨詳於虛賦者民寢病也
風俗媿惡竝書者民所習也茲其望
乎上者尤厚乎終之以方外而寺觀
附焉狄異教立民坊也蓋胡君兼治
春秋學與譚子同道故多用斷例然
而不苛不固不遺不襍斯其善志也

已雖然亦欲託諸行事則寧有大於
學校食貨者邪而雄之積弊亦是爲
甚夫養士如種木然株而植之能株
而成之乎民輸當如負物無過其力
過其力則仆矣余往取士于民間至
數十人竊取博種之義由今觀之何
如也諸君子或篤教誨亦其以類相

長有足相承耳虛賦不可以蠲則必
取諸民胡君以餘田補見戶之虛以
虛田虛丁折力役之征如彼負者少
損矣其有弗任乎夫學校興則選舉
貢辟廕敘風俗由此其階也虛賦平
則戶口料役物產秩祀由此其資也
事蓋有舉其諸善從是故君子

惟大之爲務安成前後守雄者三人
若劉公嘉秀特著在傳胡君劉介廉
靖似之而譚子妙年清才厲志秉禮
其將以脩曲江之業乎宦思同績鄉
思同德斯志載續當有執簡以從者



南雄志序

奉勅授學士中順大夫廣東義州按察司副使前翰林院庶吉士莆田林某同職

嘉靖壬寅冬十月南雄志成上余請
敘得覽觀焉有圖有紀曰何幅員之
小也其廣下郡與然而介于兩省之
間矣母曰民寡惟慎厥事我前聞之
也有職官官列而賢不肖古今晰矣

思齊內省孰無是心高輔何人也然
固卑微以獲戾去猶亟書其績爲敘
屈也公論在人心蓋茲徵之爲善者
何懼焉有選舉學校則科第間一見
耳夫自元以往吾無論矣惟

皇朝以文章取士士競競濯磨以進而
賢者能者詎有出此之外者乎是何

其寥寥然孟軻云若夫豪傑之士雖
無文王猶興況遇文王此中林兔罎
所爲皆干城腹心也今

聖明馭極緝熙敬止縱不爲豪傑豈可
自讓於中林兔罎之夫哉然鼓舞振
作誰任其機庸弗惕與庸弗惕與提
封至風俗篇言士恥奔競賈憚遠商

工無巧技喜曰夫猶先王之遺也尚
質務本則人罕淫心然哀以鼓吹禮
無親迎不亦陋乎反正之思容但已
哉營繕之政有國所不廢也然本以
利民非以害民君子慎之開路六議
其仁人之言乎邑無全里里無全甲
甲無全戶吾於食貨志傷焉調攝攻

補如醫用藥則良司牧矣秩祀典也
兵防衛焉敬以臨之故歆練以教之
故不棄其誰則知之迨讀至諸傳名
賢忠烈貞孝簡核詳慎可興可勸史
氏之規也余則潛然涕出矣替我先
君司教茲邦忠信仁義交孚上下今
猶烈烈耿光乎是識諸人心者也雲同

何忍言哉方外殊品也可以書可以
無書備之云耳夫有天下之動而文
籍生焉曰經曰史經以明道史以著
事要之匪二也故讀經不讀史曰踈
讀史不讀經曰舛今六經尚矣諸史
備矣志史流也古列國皆有史今郡
縣卽古列國是以各得志焉君子曰

夫志昭往貽來也有三才之道焉故
仰稽天文俯察地理中周人事志則
具矣爲政者亟修之然怠者不肯修
愚者不能修弱者不暇修余茲歎耳
見斯志而知胡守之善政也胡守官
未數月遂銳意纂集猶不自專特請
督府蔡公